



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

Mapa crore 3.5 adokdaksütsü atema Cabinet-i
Employment Linked Incentive Scheme agizük

Leverkusen-i pound million
35 agi Quansah alizükogo



VOL. XXII ISSUE NO. 259 (ADOK 259)

DIMAPUR

YANGTEPNÜ (THURSDAY)

CHITENI (JULY) 03, 2025

₹ 5.00

Reservation policy reprangshitsü mapang agitsü: CM Rio

Kohima, Chiteni/July 02 (TYO): Nagaland sorkar mapang nung menden wazüka yutsüba inyakyim reprangshitsü asoshi Committee ka tentettsü state sorkari renemba nung nüburtemi aremzüka atatsüla, ta Nagaland Chief Minister Dr. Neiphiu Rio-i Bodhbarnü ashi.

Kohima nung sentong ka nung adentsü lia osangbener den jembidang, Commission indang mapa ya kanga tejangja aser tangsa-tang iba results mangutsü, ta Dr. Rio-i ashi.

Administration nunga süang, reservation nunga süang mesüra delimitations nunga süang, temelenshitsü aliba ajunga national census sülen ang inyaktettsü, koba 2027 nung tenzüksü imlar, ta pai ashi.

"Onoki khen atema mera maginer. State ajunga nung iba review exercise kanga junga agitsüla," ta CM Rio-i ashi.

Tang aliba system nung metokmeperi lir aser itemji

tajungtiba nung bentettsü asoshi mera agitsü, ta pai ashi.

5 Tribes Committee on Revision of Reservation Policy (CORRP) ajanga iba Commission nung civil society organizations (CSOs) aser NGOs madentsü akhangba nung telangzüba agütsüdang, "Sorkari parnok takhangba reprangdangtsü. Asenoki atasatsüla aser reprangtsü," ta pai ashi.

CORRP nungya kin tulu pongu - Angami, Ao, Lotha, Rengma aser Sumi - lir aser parnoki yashi-yakünü ang sorkar mapa nung menden wazüka yutsüba reprangshitsü asoshi Commission ka tentettsü Cabinet ajanga telemtetba agiaka sorkari mapa meinyakba tebilemsü lemsatepa liasü.

CORRP ajanga tang aliba reservation policy agientsü mesüra kin pongu nem unreserved quota lezmüksütsü akhanger.

Lanurtem temaba jenjangi ajungkettsü nükjidong lir: CM Rio



Dimapur, Chiteni/July 02 (TYO): Mangdang akaba tanur ajak anitettsüsa jenjang yanglutsütsü temulungtetba tulu nung inyaksangshia arur, ta Nagaland Chief Minister Dr. Neiphiu Rio-i Bodhbarnü ashi.

Kohima nungi north tsütsü kilometre 15 shi pilar Tsiesema nung aliba Capt. Neikezhakuo Kenguruse, MVC, Centre of Excellence & Wellness nung JEE aser NEET agütsütsü jangra aliba batch asem buba aser pezü buba den jembidang, "Tanü ni nenok den nenok indang Chief Minister ka amak kisüing masü saka külem Naga nunger ka ama anüngleni yima atutsü mangdang aliba tanur nem bendanga agütsür jenjang yanglutsütsü teimla nung tejak tenteta jembir," ta Dr Rio-i ashi.

Iba Centre ya Assam Rifles aser NIEDO (National Integrity and Educational Development Organisation) lungjemer lapok, kong Axis Bank ya financial partner lir aser iba centre nungya Nagaland nung tepetzük kibong nungi süaka sempet tajung alirtem competitive exams atema renemshiba nung angati yangji lidaka coaching agütsür aser personality development mentoring agütsür.

Iba institution ya Captain Neikezhakuo Kenguruse, MVC nem akhum tetushi agütsüba dang nungi taoba "living legacy" ka lir, ta CM Rio-i ashi.

"Iba Centre ya academic atema kisüing masü - ibai movement ka lir. Empowerment, maongka kasa aser asen lanur tarutsü tia ajungtsü asoshi movement ka lir," ta pai ashi.

Centre nungi takok anguba indang pelaba lemsatepdang, mezüing batches asem nungi kaketshir ajungai (104) NEET aser JEE exams nung takok noklang nung noklang shilem ngua liasü.

Assam Rifles temi security mapa dak alia oa inyakba atema pai tenüngsang agüja liasü.

"Masetsi bendanga agütsüba, lenisüba aser tenzüksü tanüla tejangja aliba yong nenoki iba Centre ya tashi aser jenjang aliba milenbong ka ama kumdaksüogo," ta pai ashi.

Axis Bank-i CSR teka ajanga iba inyakyim yariba asoshia Dr Rio-i pelaba lemsatep aser nenoki senotsü agütsüba ajanga Nagaland kinük-kisang nung aliba lanurtem mangdang nung tashi agütsür ta ashi.

Iba inyakyim nung NIEDO ya academic backbone amai lir aser nenoki anibelem mesasai

tajungtiba agi bendanga agütsü inyakba ajanga nübu tajung jenti adokdaksüogo, ta ashi.

Batch pezü buba nungi kaketshir 33 dang CM Rio-i, "Nenok asüing asoshi milen abener tem lir. Nagaland tesem balala nung aliba kibongtem tejangraba nenoki bena lir. Nenok sempet nung onoki amanger aser mera ajak nung külemi jajatsü," ta ayongzüka liasü.

Par parnok dang takum nung tamakok ajurudang tezü danga malitsü saka asendenshir inyaksü ayongzüka liasü.

Sentong nung Director General, Assam Rifles, Lt. Gen. Vikas Lakhera-i o tatsüka jembidang, yimya balala ajanga Northeast renlok daksüba nung onoki maneni bendanga agütsür inyaksü, ta ashi.

Assam Rifles temi ano iba ama institute ka Mokokchung nung tenzüksü, koba state nung Medziphema aser Chieswema, Kohima sülen tasembuba alitsü, ta DGAR ajanga metetdaksü.

Iba sentong nung Minister G. Kaito Aye, Advisors S. Keoshu, Temjenmenba aser Nyuvitho Nyuthie, IG Assam Rifles Maj. Gen. Manish Kumar aser Asür Captain Kenguruse kinungertem dena liasü.

Niuland nung Pharmacy licence 15 agientsüogo

Dimapur, Chiteni/July 02 (TYO): Drugs & Cosmetic Act, 1940 & Rules 1945 nung shia aliba ama pharmacy tem azüoktsü mechi Niuland District Administration, Police Department aser Chief Medical Office, Dimapur nungi Asst. Drugs Controller Martemjen Longkumer aser DCO Boto Sema nunger anir Joint Enforcement Drive ka July 1, 2025 nü ayongzüka

Niuland district nung pharmacy tem sema jaja liasü.

State Drugs Control Administration Kohima nungi totuyuba agütsüba ama Drugs & Cosmetic Act, 1940 & Rules 1945 indang Rule 65(2) aser Pharmacy Act 1948 indang Section 42 nung aibelena aliba mechi Niuland district kübok Pharmacist 15 indang licences agientsüogo, ta sangdong ka ajanga ashi.

Assam Rifles-i Dimapur Airport li acre 18.8 mazüngtettsür

Dimapur, Chiteni/July 02 (TYO): Dimapur airport renloktsü asoshi Nagaland Chief Minister, Dr. Neiphiu Rio-i kanga temulung agütsür, kechiaser state nung airport ya kisüing lir aser linük tanüingba den sendaktepba nung tongti shilem agir.

Mapang talangka atsütepa aruba sülen ozüing alema agia aliba ali 17.9 acres state sorkari azüngteta Airports Authority of India (AAI) nem agütsüogo. Central Reserve Police Force (CRPF)-ia Dimapur airport indang ali acres 8.4 agia aliba azüngtettsüogo, nungji airport ulushiba Phase I yarisermer.

State sorkari Ministry of Home Affairs (MHA) aser tapet stakeholders den teka

amteper Assam Rifles ajanga tang agia aliba ali 18.8 acres salatsü asoshi meranga inyaktepa aru, koba Dimapur Airport ulushiba Phase I atema kanga tongtipang lir.

Assam Rifles nem temelen Chümoukedima district kübok Shokhuvi village nung ali latetja lir, kong Training Centre and School tasen amenoka tang yangji inyakyim ajak tenzüko. Yamaji terenlok tajung liaka Assam Rifles temi amokbanger aliba ali tasazük acres 147 nungi 18.8 acres ya tang tashi magütsüteti lir, aser iba yongji airport infrastructure mapa tongtipang inyakba nung menur.

New Delhi nung July 1, 2025 nü high level meeting ka mena inter-agency dialogue liasü aser

iba ali Assam Rifles nungi AAI nem agütsütsü atema Ministry of Home Affairs ajanga totuyuba agütsütsü kanga tongtipang kumogo, kechiaser Nagaland nung airport ka kisüing aliba tuluba kuma yanglushitsü asoshi tongtipang lir.

Chief Minister Dr. Neiphiu Rio ajanga taoba mapanga Union Home Minister Amit Shah dangi shiti ka zülua ali mesü-menangba ajanga Dimapur Airport tuluba kuma meyanglutetba indang lemsatepa liasü.

Ali agütsütsü aliba tang tashi magütsüba ajanga AAI indang Master Plan phase lemsar inyaksü aliba Phase I nung tetsükdaksür ajurur lir. State sorkar aser CRPF tsüingta

teinyaksü inyaka ali azüngtsüogo aser nüngdakba ali agütsüogo.

Assam Rifles asoshi Shokhuvi nung facility peria lir, anungji tang parnok aliba ali soita ayutsü menügdaker. Tezuluba aika agütsüogo, saka iba ali agütsütsü maparen tang tashi meinyaki lir.

Iba yongji Chief Minister Dr. Rio-i Ministry of Home Affairs dang Assam Rifles temi amokbanga aliba ali agüja mapang shidak nung terenlok maparen tenzükdaksütsü asoshi tekeraba nung totuyuba agüjang ta mepishio.

MHA ajanga totuyuba agüja structural compensation agütsüba sülen parnoki agia aliba ali azüngtsütsü mulunga

aliba lemsatepogo, saka ibai Central Government entities (Assam Rifles aser AAI) ana tsüingta asünungji, structural compensation agütsütsü madoker aser iba ali ya "as-is-where-is" yimya nung agütsütsü, ta Nagaland Chief Minister Dr. J. Alam, IAS-ia ashi.

Pai Home Minister dang iba ali AAI nem tekeraba nung agütsütsü asoshi nüngdakba temelaba tem agütsütsü mepishia liasü.

State sorkar-i CRPF aser AAI den teka amteper terenlokba jenti liaka, Assam Rifles nungi alib 18.8 acres agütsütsü aliba ya Dimapur Airport expansion Phase I tenzüksü asoshi tongtipang lir.

Zunheboto nung NTCP kübok DLCC senden menogo



Dimapur, Chiteni/July 2 (TYO): National Tobacco Control Programme (NTCP) kübok District Level Coordination Committee (DLCC) senden July 2 nü DC Conference Hall, Zunheboto nung menogo.

Iba senden ya Deputy Commissioner, Zunheboto, Dharam Raj, IAS lenisüba nung agia liasü.

Sentong nung o jembiba mapang Deputy Commissioner-i tawa district nung yi, temesepba mozü aser moko agi yangluba osettem apuba indang metetdaksü. Pai, Zunheboto Town Council dang awareness sentongtem ayongzüka agitsü aser kiyong balala nung ozüing alema yokyatsüyartem anema jenjang tapet agitsü mepeshia

metetdaksüogo.

Paisa, jila nung licensed dokantem ajak geo-tagging aser mapping asütsü nungdakba lemsatepa liasü. "Educational institution telongtet yard 100 nung meyokra moko ayokba ya ozüing alema masü," ta pai ashi. Paisa, pharmacy, bakery, aonsotsü ayokba dokan, toy shop, aser stationery store tem nung moko agi yangluba osettem ayoktsü memelatsüla, ta ashi.

Deputy Commissioner-isa, mapangshia meita aotsü aser tobacco regulations indang metetdaksütsü atema dokantem kima signboard tem toktsütsü koda tongtibang iba indang lemsatepa liasü.

NTCP indang District Nodal Officer Dr. K. Rosy Yhome-i, 2019 küm nungi NTCP aser National Tobacco

Control Cell (NTCC) Zunheboto-i benoka inyakba maparentem indang metetdaksü.

Lai, institution, yimtsüing, health unit aser kibongtem Moko nungi pila alitsü atema ajungmesotsü atema jenjang agibatem indang lemsatepba den Cigarettes and Other Tobacco Products Act (COTPA) indang provision tem indang metetdaksü.

Sentong nung tobacco-free school ishika nem tetushi agüja liasü. School tem rongnung Cedar School, Aghunato Town; Bright Wave School, Tokiye Town; Government Middle School (GMS) Tokiye Village; Government High School, Satami Village; GMS Shevishe Village aser GMS Keltomi Village nunger densema liasü.

Mygov-i National-Level tetoktepba tem ayonger

Dimapur, Chiteni/July 2 (TYO): Ministry of Defence den MyGov aser All India Radio n longjemer taruba Independence Day nungdem nung online tetoktepba aser inyakyimtem ayongzüko.

"Independence Day 2025" ta nungja agütsür linük kübok tesem balala nungi nüburtemi iba tetoktepba tem nung shilem agitetsü, koba MyGov portal nung live lir:

* "Operation Sindoor - Redefining India's Policy Against Terrorism" onük nung ajemdaker essay tetoktepba.

* "New India - Empowered India" omen nung ajemdaker painting tetoktepba.

* "Walk to the Monument Sites of Indian Independence" omen nung ajemdaker Reel tetoktepba.

MyGov portal nung Central Ministry aser Department temi ayongzüka tetoktepba nung takok angur parnok 30 official Independence Day benjung nung shilem agitsü atema Ministry of Defence-i jaoktsü.

Ministry of Development of North Eastern Region-i iba osang ya North East nung aliba state tem indang Chief Secretaries tem nem agütsüogo aser department ajak dang employees aser nüburtem nem iba campaign indang osang agütsütsü mepeshia

metetdaksüogo.

Iba dak sendakba nung Nagaland sorkar Home Department-i, Department of Information & Public Relations (DIPR) dang, state nungia nüburtem nem takokba tashi shilem agidaksütsü atema local osang kaketterm ajanga osang prokshitsü tetuyuba agütsüogo.

Tetoktepba nung shilem agitsüpurtemi MyGov portal at: <https://www.mygov.in/campaigns/independenceday/?target=webview&type=campaign&nid=0> ajanga tetoktepba indang osang tejangja agitetsü aser parnok indang essay, panting aser reel ya iba ajanga benoktettsü.



Meluri district administration, police aser town council nungeri Meluri nung July 1 nü yi raksa intoktsüba noksa nung angur.

DOSE-i tesayurtem award aser senotsü teyari indang metetdaksü

Dimapur, Chiteni/July 2 (TYO): Directorate of School Education-i sangdong ka ajanga state sorkar curriculum sülen anidakba sorkar aser Private School tem nungi tesayurtem nem tetushi agütsütsü aliba indang metetdaksüogo.

Tesayurtem shirnoki bendanga agüja inyakba ajanga education jenjang tajungba kümdaksüba den pei kaketshirtem taküm melenshitsüogo, parnok ya Administrative officers, Institution tekolaktem aser yimtsüing/sub-division/district level nung education wadang nung sendaka aliba NGO temi district/state Teachers award 2025 atema nominate sütetsü.

Iba tetushi atema nomination form aser eligibility criteria tem district shia Education Office aser Department indang website nung angutsü.

Kasa mapang nung tesayur (sorkar curriculum sülen anidakba sorkar aser Private School tesayurtem) shirnok lemter lir aser yareta shirangba ajanga mapang talangka temang anepaludar, mesüra lendong balala agi kongshir tang tashi grant/relief kecha mangu ali, parnoki departments website nung agüja aliba format nung senotsü teyari atema apply

sütetsü, ta metetdaksüogo.

Senotsü teyari atema pei pei DEO/SDEO nung nominations forms benoktsü atema tatembangbuba anogoji 20-07-2025 asütsü.

Maneni Ministry of Education, Department of School Education & Literacy tetuyuba dak ajemdaker Directorate of School Education-i, tesayurtemi online ajanga peisasa nominate asütsü atema web portal ya 23-06-2025 nü lapoktsüogo aser tatembangbuba anogoji 15-07-2025 asütsü ta metetdaksüogo. National Teachers Award atema tesayur aser school tekolaktem tajemba agi küm terbosa mapa inyaker alitsüla.

Iba dak sendakba nung tesaysurtem shirnoki bendanga agüja inyakba ajanga education jenjang tajungba kümdaksüba den pei kaketshirtem taküm melenshitsüogo, parnoki atakzüka aliba mapang tashi nung pei sasa nominate sütetsü. Maneni osang tejangjaba web portal <https://nationalawardstoteachers.education.gov.in> nungi agizükettsü.

Anungji DEOs/Sr. SDEOs/SDEOs ajak dang parnok kübok aliba tesemtem nung iba osang ya prokshitsü mepeshia metetdaksüogo.

Toolkit lemtsüba sentong agi



Dimapur, Chiteni/July 2 (TYO): District Industry Centre, Phek aser District Administration, Phek na longjemer PM Vishwakarma atema Toolkit lemtsüba sentong July 2 nü DC Conference Hall, Phek nung ayongzüka agiogo.

Deputy Commissioner aser Chairman, PM Vishwakarma, Phek, Rhosietho Nguori, NCS-i iba sentong nung tajungshi o jembia aser beneficiary tem nem

toolkits lemtsüba den parnok dang item hadir ya takok tashi tajungtiba amshia employment adokdaksütsü ayongzüka liasü.

Iba sentong nung beneficiary 38 nem toolkit agüja liasü.

Sentong nungsa PM Vishwakarma indang Functional Manager, DIC, Phek Athrise-i metetdaksü aser Common Service Centre (CSC) nungi report ka Thupubu Venuh-i agüja liasü.

Nisung ka küm 3 tepuokdaki yok

Dimapur, Chiteni/July 2 (TYO): Duvelu Vero NJS, PD&SJ cum Special Judge, Kohima-i, aija alir Azhovi R.K, U/S. 8 POCSO Act kübok aibelenba atema küm asem simple imprisonment aser U/S. 354 (1)(i) IPC kübok aibelenba atema küm ka tepuokdak ayutsü obendang agütsüogo. Temerenshi anaprongla ya mapang ka nung dang abentsü.

Obendang ajanga ashiba

agi, aibelen ya arishi küm 16 kübok aliba tanur ka Sexual assault asüba dak sendaka lir. Ken o ya UBS! Dziesevino Yhoshu-i bushisüngdang asü aser okadak Special Public Prosecutor Sashimongla Jamir-i achaayanga liasü.

Special judge-isa, Kohima Legal Service authority dang Victim Compensation Scheme kübok senotsü agütsütsü atema inyaksangshitsü tetuyuba agütsüogo.

Mapa crore 3.5 adokdaksütsü atema Cabinet-i Employment Linked Incentive Scheme agizük



New Delhi, Chiteni/July 02

(Agencies): Taruba küm ana tsüingda India linük nung mapa crore 3.5 adokdaksütsü atema sen 1 lakh crore jenjang Employment Linked Incentive (ELI) Scheme agizükogo, ta ketdangsertemi metetdaksü.

Ato kilonser, Narendra Modi leniba nung amenba Union Cabinet senden nung ELI scheme ji agizükogo.

Iba scheme ajanga mapa adokdaksüba maparen balala nungittsü aser talisa manufacturing sector nung rangloker inyaksü. Iba scheme kübok tang mezüing mapa inyakterem nem küm ana tashi itasen 15,000 tashi agütsütsü, aser manufacturing sector nung

inyaktertembo ano küm ana tali shimshitsü.

ELI Scheme ya Union Budget 2024-25 nung sangdonga liasü.

Mapa adokdaksütsü aser lanur crore 4.1 nem skill development aser tanga maongka balala agütsütsü atema Ato kilonser package kübok scheme pongu rongnung ELI scheme ya densema lir. Item scheme pongu atema budget nung sen 2 lakh crore lemozükja liasü.

ELI scheme atema sen crore 99,446 lemozükja lir, aser iba scheme kübok küm ana tsüingda mapa crore 3.5 adokdaksütsü nükjidong lir. Iba nungjagi tajangzük angutsüpur crore 1.92 bo tang mezüing mapa nung ajemoka inyakterem asütsü. Iba

scheme kübok tajangzük angutsüpurtemji August 1, 2025 nungi July 31, 2027 tsüingda mapa nung shimokertem asütsü, ta official sangdong ka ajanga metetdaksü.

Iba Scheme kübok shilem ana alitsü- Part A ji mezüingpurtem asütsü aser Part B ji mapa teinyakdakpurtem asütsü.

Tang mezüing mapa nung shimmertemji EPFO nung register süa alirtem asütsü aser ita ka EPF taa sen 15,000 ji shilem ana lemsar agütsütsü. Iba atemaji itasen lakh 1 tashi angurtem temsüa lir. Mezüingbuba instalment ji mapa nung ita trok abensaba sülen agütsütsü aser tanabuba instalment ji mapa nung ita 12 abensaba aser financial literacy programme renema tembangba sülen agütsütsü.

Sen rizüing aysütsü ajungshitsü atema incentive shilem kabo mapang tatakzük ka atema deposit account nung rizüingsütsü aser tesülen ibaji agizüktsü akok.

Ano Part B kübok sector balala nung inyakterem yaritsü, talisa manufacturing sector nung inyakterem yaritsü. Sorkari küm ana tashi ita shia incentivise sen 3,000 tashi agütsütsü aser manufacturing sector nung inyaktertembo incentives ji küm 3buba mesüra 4buba tashi atsülangtsütsü.

EPFO nung register süa aliba establishments-i nisung anana tali mapa nung shimoktsüsa akümtsü (mapa inyaker 50 dak tajemba aliba establishments) aser mapa inyaker 50 dak tali aliba establishments-i mapa nung nisung pongungu tali shimoktsüla.

Part A kübok mezüingpurtem nem DBT (Direct Benefit Transfer) mode ajanga sen agütsütsü aser Part B kübok mapa inyakterem nem PAN-linked accounts ajanga sen agütsütsü.

India aser France na külem exercise SHAKTI tembangogo



New Delhi, July 02

(Agencies): India aser France sepaitem senteper hopta ana tashi France nung Shakti 2025 Military Exercise agiogo; security tsütsü tayongzükba balala koktettsü nükjidong nung iba exercise agi.


June 18 nungi tenzüka July 1 tashi India aser France sepaitemi armoured & tactical vehicles aser raradang amshiba tayimtsü

50 amshia iba exercise agi.

Iba exercise nung French Army kübok unit balala (army, navy aser airforce) nungi sepai 500 dak temai shilem agi aser India nungi Jammu & Kashmir Rifles battalion ka nungi aser tanga services nungi sepai 90-i shilem agia liasü.

Linük ana nungi sepaitemi exercise ji Monclar district kübok Aveyron aser Hérault nung agi.

India-i kiralongra nungi sensotem kümzüktsü: Jaishankar



New Delhi, July 02

(Agencies): External Affairs Minister, S Jaishankar-i, sensotem kiralongra nungi kümzüktsü atema India dak temeden lir, aser iba temeden amshitsü atema onoki kecha marendaki inyaksü, ta metetdaksü.

Mongolbarnü Washington, DC nung US Secretary of State Marco Rubio-i ayongzükba Quad foreign minister tem senden nung jembidang Jaishankar-i, India-i kiralongra khenyongi magizüktettsü aser partner linüktemia ibaji angateta pusemstsü imlar, ta ashi.

Iba senden nungji Quad züingsem linüktem- US, Australia aser Japan nungi Foreign Minister tem-a densema liasü.

Jaishankar-i, "Alimai kiralongra ya khenyongi magizüktettsüla. Takoksa angurtem aser aibelenertemji kasa mezüingshitsüla. Kiralongra nungi sensotem kümzüktsü atema India dak temeden lir. Onoki iba temedenji amshitsü aser Quad züingsem linüktemia ibaji angateta pusemstsü onoki imlar," ta metetdaksü.

Iba jakdang New York nung Newsweek CEO, Dev Prasad den jembidang Jaishankar-i, "Onoki iba nungji metsütsü. Parnok yagi arua kiralongrara onokia yangji aibelenertem anema inyaksü. Nuclear agi amokmerenba nung onok melaotsü aser kiralongrartem dang tai matoktsü. Ozü nüburtem kümzüktsü atema onoki kechi tim'ar ibaji inyaksü," ta ashi.

S Jaishankar-i June 30 nungi July 2 tashi US semdang aser taküm tang agi tanabenbuba pai Washington semdanga Quad Foreign Ministers' senden nung aden.

THE HANS FOUNDATION CORRIGENDUM / EXTENSION NOTICE

Tender Number - THF/HO/AD/2025-26/001
Tender Dated - 03rd June 2025

Invitation for Bids-Extension for Vehicles (MMUs-Ambulances) Category Only

The Hans Foundation (THF), established in 2009, is a Public Charitable Trust working towards creating an equitable society by empowering marginalized and underprivileged communities in India.

With reference to the tender published earlier for the sale of used Vehicles (MMUs-Ambulances), office furniture, office equipment, IT assets, and portable lab machines, sealed bids were invited from eligible and interested buyers.

Due to a limited number of bids received for Vehicles (MMUs-Ambulances), the last date for submission of bids is hereby extended only for the Vehicles (MMUs-Ambulances) category.

Revised Schedule (for Vehicles (MMUs-Ambulances) category only):

Revised Last Date for Submission of Bids:	09th July 2025, till 11:59 PM
Revised Date & Time for Opening of Bids:	10th July 2025 at 03:00 PM

Note: The extension is applicable only for the Vehicles (MMUs-Ambulances) category. All other categories (office furniture, office equipment, IT assets, portable lab machines) remain closed as per the earlier deadline.

Vendors who have already submitted their bids for Vehicles (MMUs-Ambulances) may, if they wish, revise and resubmit their quoted prices during the extended bid period.

Vehicles (MMUs-Ambulances) Category Overview:

- All vehicles are in running and good condition.
- Models include Force Motors' Traveller, Tata Yodha, Tata Winger, etc.

Tender documents can be downloaded by scanning the QR code or by visiting the link below: <http://thehansfoundation.org/bids/>



The Hans Foundation

Wing B, 7th Floor, Milestone Experion Centre,
Sector 15 Part 2, Gurugram, Haryana - 122001

GOVERNMENT OF NAGALAND DIRECTORATE OF HEALTH & FAMILY WELFARE NAGALAND: KOHIMA

NO. DHFW-4/NSG/CUET-B.Sc(N)/2025/ / Dt. Kma the July' 2025

NOTIFICATION

This is for general information that starting from academic session 2025-26, there will be no more General Nurse and Midwife (GNM) course as previously conducted by the Department of Health & Family Welfare. With the upgradation of the 3 (three) Schools of Nursing to College of Nursing, namely;

- College of Nursing, Naga Hospital Authority Kohima.
- College of Nursing, District Hospital, Dimapur.
- College of Nursing, Dr. Imkongliba Memorial District Hospital, Mokokchung.

The new course of B.Sc (Nursing) for these colleges will begin from the academic session of 2025-26. The entrance exam will be through the Combined University Entrance Test (CUET- UG) and the seats for the colleges can be availed through the Directorate of Technical Education upon their notification and updates. The total number of seats per college are as shown;

Sl. No.	Name of the College/Institute	Total seats
1	Naga Hospital Authority Kohima	20
2	District Hospital Dimapur	40
3	Dr. Imkongliba Memorial District Hospital Mokokchung	40
	Total	100

Candidates are advised to take note of these changes and visit the necessary websites in due course for information and updates.

SD/-(DR. MERENINLA SENLEM)

Principal Director

**Directorate of Health & Family Welfare
Nagaland: Kohima**



TIR YIMYIM YIMOBILEM (EDITORIAL)

DIMAPUR

YANGTEPNÜ

CHITENI 03, 2025

Tsümar dang ali ayokba !

Alima nung nisungtem asoshi rongsen tulutibaji ali ya lir, kechiyong ali ya talitsü asoshi dang masü ali nungi dang taküm alitsü asoshi züsenteda chiyonger, anungji nisung ka asoshi talitsü aser aluyimtsü asoshi ali kara, pa mesüra la asoshi ajak kar ta angatetsüla. Ibaji kodang asenokia bilemdangdir, asenok Naga nunggerbo aser talisa asenok Aorbo ajak takar-a ta asenoki angatetsü, kechiyong asenokbo ali makar shinga mali. Ajisüaka, alima nung nisung aika aluyimtsüba lijibo yutsür pei alitsü asoshi ki tilaka yanglutsüa ali kimong makaba purtem aika lir, item rongnungji India lima kisung nunga ali tilakata makar nütsüng million 200 shi lir. Itemji aika talidak maka yimti tezülen adenshia yim kümteta aliba asenoki angutsü. Ano, item ali makartem aika pi takar li nung alu ayimer, anungji züsentedba shilem tulubalenka ali kibur nem agütsür aser ano sen apua pi lu nung alu ayimertem kodang sentsü maotetsüsa kümdir, shisabolu khuret makok, peisasa suseta asür. Itemjia kodang bilemdangdir, asenokbo taküm nungdak asoshi kecha shisabolutsü mali, Tsüngremi molamoashia moaja dang lir. Ajisüaka, asenok asoshi timtem kaji asenoki ali nungi asen peri züsenteda mechiyongteter aser ali nung akaba rongsentem agi sen mekümteter, iba jagi asenok ali nungbo takar saka sen nungbo sensaker lir. Ibayongji, asenoki timtem marem tangar dang ali ayoker, saka ali ayokbaji asenok asoshi nungdak peridaktsüba mapa ka masü, saka talila sensakba aser makaba akümtsü asoshi tenzükerba dang lir. Ibaji meteta alemli British nungger aliba mapang nungi Naga limaibo tangar bendanger, talisa tsümartem dang ali ayoktsüabajibo yutsür, tarua marudaktsü aser tarunertem asoshi anogo ishika atema temelaba ILP agütsü. Iba jagi tanü tashi Naga lima nung Naga nungger lushu ya Naga nungger meyong lir. Ajisüaka, Nagaland-sa asüyonga Dimapur yabo Naga nungertem dang masü saka mezünyongji arua alirtem rongnung tsümartem, talisa, Marwari, Bengali, Nepali aser Muslim nungertema aika lir. Aji oda, Dimapur town tiyong nung Muslim nungger mang aremdak leper tesem tuluka wazüka lir. Ano, Marwari kiyong tuluka lir aser Bengali nungger kiyonga train station temeket nung lir aser Nepali Bosti dena kümteta aliba asenoki angur. Iba jagi 1963 küm Nagaland state akümba anogo tashi nung tsümartem asüyonga shirnoksa Nagaland nung arua liasü, parnok aser parnok chirnur aser semchirsemnurtem ajakji Nagaland senso asütsü melar. Ibayongji, Dimapur nung tsümartem aika pei ali kimong nung ki yanglur alir. Ajisüaka, parnoka ali kimong dak alaka Dimapur district nung aluyimtsüsabo alu yateta maka. Iba jagi kasa sensosanger asüyonga lisopurtem o jenoka alirtem na bendanger. Ajisüaka, asenok mekümdangba ajanga yashi arur tsümartema dena senso kümdaktsür Dimapur nung ali kimong aser kiojen parnok indangang teimba aser tuluba akatsüsa kümdakja lir. Item rongnungji tang Dimapur Naga Students' Union (DNSU) purtemi puteta tenüng amshisang Nirmal Jain ya ka asütsüa akok. DNSU purtemi ashi ama, Nirmal Jain amaji tesülen Dimapur nung arua alir tsümartem aika Nagaland senso kümer lir, kechiyong parnok nemji Nagaland government-i Indigenous Inhabitant Certificate agütsür. Indigenous Inhabitant Certificate tetezü Nagaland nung alir lisopur ta kuli agütsüba lir. Aji oda, Nagaland state kümer tesülen Nagaland-i ayangi arurtem aser ano yashi Naga nungger kidang semloka alirtem nem tashi asenoki lisopur temeten agütsüba agi tanübo parnokji asenok dang nungi takarba aser tashi tuluba kümer asenok mezüngshii kümogo. Atangji, asen lima nung ILP ozüng aliba agi aser bendanger dang ali mayoktsü ozüng takang yanglua aliba ajanga asenok lisopurtemi yoknüyonga meyoktet tanü tashibo asen lima kümzüka lir. Ashi, ali mayoktsü ozüng mali asübo, asenok timtem marem asenoki Nirmal Jain nungger ama dangji Nagaland nung asen akaba ali kimong aser alushi ajak yokadoker, lisopurbo lisopur saka pei tetsüng ajemdakdaka pei libo tilakata maka, pei lima nung bendanger kümer lila !

OLEMSABANG

Arogo ya Kotaki aotsü sayuba telok asütsü tim

S. T. Yapang Lkr, Kohima.

Arogo ya Kotak lenmang sayuba telok asütsü tim, yangi Nagalima arogo aika asoshi teshisadangtsü kar lemsateper;

1. Tanurtem scholarship anguba nungi ter shilem abenba arogo aikadi pela zünga ashir, pa/la takok tajung anguba aser sensaker asüba agi sensaker meyong scholarship anguba asoshi ajaki peladi, saka sensaker masü sürnung sensaker ta zülur scholarship agizükba arogoi kechiba pelashishia azüngtsü/agizüktsü? Sentep senshir Deacon board-i iba tanubusang/tanutsüla aser tsüraburji jar sayutsüngi tajung agütsür senji meyipa agütsütsüla, ajimesüra iba arogoi tamanger Kotaki aotsü soita ayuba telok ka dang akümtsü. Nisung kati ochimashi nungi ter shilem shitak agütsüba agi pa sen tanüngba 90% ji ochishiba sen akümtsü Laishiba tesayuba mali, saka arogoi pelashishia agizük nungji nisungba jakibo pa/la sen tanüngba 90% ji temeshi ama agiba yimya ka asen Naga nungger aika dak lir, ashi arogoi ochimashiba sen ya magizüktsüsa sentong ka yanglura ochimashi rongsen bendenba ya kanga ajemtsü, idangji asen lima ajungkettsü. Mapijemi aliba agi süra aji süiogo, saka tang nungi danga arogoi ochimashi bendenba rongsen nungi tenla mesüra ter shilem magizüktsü tim, ajimesüra Arogo aika Kotak lenmang shibangba telok ka dang akümtsü.
2. Tanurtem atema dang masü taintem atema Govt. nungi sensaker asoshi teyari balala aika arudar tatishitsü agi, PM-KISAN, NBOCW, MGNREGA, PMAY-G/U, PMMVY, SBM ano aika lir, ajisüaka item nung ya itasen achir aser itasen machi yonga takar mesüra metemsüba nübu aika zülüoka lir, item senotsü anguba nungi kasa arogoi tenla/ter shilem agizükdar, anungji tamangertemi pei sasa angateta item amala sensaker meyong nungi sensaker masürtemi pila alitsüla, kechiyong Arogo aika nung item nungi pila liang ta mashitsü, saka na aji agi kechiba nai amangba Tsüngrem yimli mengutetsüsa alitsü?
3. Nütsüng asoshi dang masü tesayur aser Laishir asoshia tekümdangtsü aika ajurua arudar, tatishitsü aser shitakba nunga tang teinyakdak pastor/missionary/ Mungdang nung GS amala pei asoba school certificate nung alemlibo tesayuri asojen repranger timba zülutsüba lir, anungji pa shitakba küm denji school documents nung tasoba küm zülua alibaji meputep aika lir, aji kecha mali, ajisüaka asen CTC nung principal inyaktsü asoshi küm 50 tema dang agir, saka shirnok tazüngba certificate nungbo küm agi mabensa saka tasoba küm agibo abensar alir itemji board tsüngdang tatok meshidaktsür pa/la joko DOB certificate nung aliba masü tetsüi asoba küm dang agitsü nangzükdaktsür inyakdaktsüa arudar, anungji item pur jaki tanga mission aser Mungdang balala nung inyaka aodanga tetsüi asobaji agitsü tim, ajimesüra item purji kenü jungkai adokdang toksa nung ontaka laoktsü. Rev, Dr, Pastor, Sayutsüngir shiba süang joko arogoi pa/la dangjia "Na DOB certificate nung aliba ama masü netsüi asoba ang agitsü CTC nung board tsüngdang nangzüker asünungji na arishipiyong koba mapa nung südir ajisa amshiangma" ta shitetsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Madhya Pradesh nung Khristan 3 amok merena mangsa anir senzü



Madhya Pradesh nung Burhanpur district nung Khristan asem kangshia Hindu nunger süngyanglu matsüngdang apudakdaksüba mapang tangokba noksa nung angur.

July 02, 2025: Tawa Madhya Pradesh state nung right-wing Hindu züngsemtemi yimtsüng ka nung sensaker Dalit nunger Khristan asem dak azükba sülen yimdong süa mangsa anir jaja aser Hindu nunger tsüngrem süngyanglu matsüngdang kangshia apudakdakja liasü.

Iba tatalokba sülen Khristantemi state sorkar dang aibelener right wing züngsemtem nem temerenshi agüjang, ta takhangba agütsür.

June 22, 2025 aonung Burhanpur district kübok Nepa Nagar yimdak Hindu telok nungi züngsem 150 shi pastor kidangi aoba sülen pa den tangar Khristan asem dak azük, ta Pastor Gokhariya Solanky-i metetdaksü.

June 25 nü osangbener den jembidang pastor Solanky-i, "Lokti jagi parnok süoshi semzüksüba sülen parnok dak azük. Parnok dang o tamajung aika ashiba sülen telung süoshi (underwear) dang semdaksür yimdong süa anir jaja," ta metetdaksü.

"Parnoki Khristantemji Hindu nunger tekülem ki kati anir aoba sülen yangji süngyanglu matsüngdang kangshia apudakdaksü," ta Solanky-i ashi.

Khristantem jagi Dalit Hindu nungertem Khristan yimsü dangi meyipdaksütsü meranger, ta Hindu nungertem jagi tai tonglokja police ket nung agütsü.

Parnok rongnung nisung kabo iba telok denji tesendaktep lir, ta jangjaba sülen pajibo chiok, ta, Solanky-i ashi.

"June 24 nü Police-i Khristan asemji local court matsüngdangi anir ao. Iba sülen court-i parnok jail nung puoktsü tuyu," ta paisa metetdaksü.

Khristantemji jail nungi bail nung anizüksü atema Solanky-i lawyers kar den inyakdar.

Mapang shia Hindu nungertemi Khristantemi

tangartem Khristan yimsü dangi meyipdaksür, ta tiyazü nung tai tongloksür, ta Khristan lenirtemi metetdaksü.

Khristan asem kinüngtsürtem jagi lokti 150 shi nungjagi nisung 12 tenüng police nem metetdaksüogo, ta Khristan lenirtemi metetdaksü.

"Aibelenertem jagisa pastor kidang Hindu nunger ana dang Khristantem anema tiyazü kuli agüjang ta mepishia liasü," ta kinüngertem jagi metetdaksü.

Pastor Solanky-i, "District police tongti ketdangseri iba tatalokba bushisüngdangtsü ta onok dang nangzükogo. Tekeraba nung ochi temeden magütsüra onoki longkak aittsü aser aibelenertem aser police anema court nung ken o benoktsü," ta metetdaksü.

"Police-i takoksa angurtem kümzüksü melen odiodia Hindu züngsemtem ang pusema liasü," ta tenük kuli alir Khristan kati metetdaksü.

Hindu nunger lokti jagi Khristantem mangsa yimdong süa anir jajaba mapang nung police-a kar liasü, ta paisa metetdaksü.

June 25 nü osangbener den jembidang pai, "Right wing Hindu züngsemtemji area nung alirtem dang lir. Parnoki mapang shia lisopur Khristantem anema inyaker aser tiyazü nung Khristantem nem tai tongloksür," ta metetdaksü.

Madhya Pradesh yimtiba, Bhopal nung alir Khristan lenir Daniel John-i, "Madhya Pradesh nung mapang shia Hindu nungertemi Khristantem amaker," ta ashi.

Khristan mission mapatem ya sensaker Hindu nungertem, talisa tribal aser Dalit Khristantem mesüzüksü atema lir, ta Hindu teloktemi bilemer.

Daniel John-i, "Khristan missionary temi sensakertem taküm jenjang tajungba küm daksütsü atema inyaker. Ajisüaka right-wing teloktemi sensakertem taküm jenjang

tajungba mekümdaktsüner, kechiyong ibaji ajanga kin telemsa (caste) tsütsü timtem adoktsü. Anungji parnoki, Khristantemi tangartem Khristan yimsü dangi meyipdaksür ta Khristantem nem tai tongloksür," ta metetdaksü.

Paisa sorkar dang Khristantem anema inyakba tatalokbatem bushisüngdanga aibelenertem nem temerenshi agütsütsü aser linük temzüng nung senso ajak nem agüja aliba yimsü temeden agüjang, ta takhangba agütsü.

"Hindu nungertem ama Khristantem-a linük sensotem lir," ta pai ashi.

Nütsüng million 72 aliba Madhya Pradesh state nung nüstüng shilem 0.27 dang Khristantem lir. Iba state nung nütsüng shilem 80 bo Hindu nungertem lir.

ANOGO ABEN TSÜNGREM DEN

Takong lima nung sayatenya

"Tzüraba li, Pai ayongtem kümdaktsür. Ibai taochi sayatenya mapa ka lir. Tajung Kibubai kecha memetetba kaji temoatsü ayong kümdaktsür. Ni tsüngsarusa lima ajanga ao, aser idakji mulungsünep angu. Tasü aküm lenden nunga ni rem lanu aser tasüngtet tzü angur. Ni Kibubai melaba ozüng nung jajara takong lenmang nunga ni narotem angur. (T. Ken 107:33-43)

Tamang kateta ainlen jajartem asoshi Tsüngremer maongkaji parnok leniba lir. Pa temoatsüba tetsüng kü dang tama orr atar. Ni kechi nüngdaker aji nguadoker alir, Kibuba den ngujemer aliba tetezü metetadoker aliba aser temoatsü. Ghonda shia tsüngchir nütsüng ka akümtsübaji tesüngmangtsü taochi lir. Anungji, kü lenmang nung ammag liaka ni temulung ajema mekümlü. Tsüngrem denbo azüngmeyakdakja yimti ama dang lir, aser pa den lungjemba kü chiyungtsü aser tzü ngulanglang.

Kibuba ket nung par chirtem temulung makai alirtem asoshi manna lir. Aser pai lung nungi tzü poktetdaksür. Pa medeni ni kechaia aotsü makok, aser pa temoatsü tzüra-a aliba lisem lima aser azüngtsü agi tulaa aliba moapu ajak nung kasa lir. Tenemtsüng ajak nung ayong alitsü, aser azüngmeyak ajemalu lenden nung ni labu naro tesünep angutsü.

IFCJ teloki raraba tensa mapang nung Israel nunger aikayariogo

July 02, 2025: Tawa Israel aser Iran na tsüngda missiles amshia raraba mapang nung International Fellowship of Christians & Jews (IFCJ) teloki emergency relief operation tenzüka Israel nung rara ajanga jenshirtem aser yirua alirtem nem dollar sen million 2.5 shi jenjang teyari agütsüogo.

Israel sepaitemi 'Operation Rising Lion' omen nung ajemdaker Iran anema raradang Israel nunga nisung 5,000 shi aienshidakja liasü aser ki aika raksaja liasü.

Iba ama tensa mapang ka nung Khristantem aser Yihuda nungertem longjemer tentetba IFCJ teloki Tel Aviv, Bat Yam, Rehovot, Rishon LeZion, Ramat Gan aser Tamra ama rara agi tamajungtiba kongshiba yimtitem nung kibong aika nem kibong shia dollar sen 225 indang prepaid debit card agütsü.

IFCJ CEO, Yael Eckstein-i, "Mapang tatsüka tsüngda tensa mejungi melenshiba ajanga teyari

nüngdakbapurtem aika liasü," ta metetdaksü.

Laisa, "Ki aika raksatsü. Tanurtem kanga tsübutepa liasü. Teintet sentotem aser tetsürtem ket nung ajungbena chiyungtsü aser mozü maliasü, aser temejangdak-a maliasü," ta ashi.

"Iba ama tensa mapang ka nung atasa-a alitsü asoshi mapang maliasü. Ibayongji Fellowship-i nüburtem nem teyari agüja süneptsütsü atema inyak," ta ashi.

IFCJ-i senotsü teyari agütsüba denji külemi bomb shelters tasen aika yangluja liasü. IFCJ-isa rara tenzüksü mapang anasa Israel-i aur bendangertem-a yaria liasü.

Iran-i missiles aser rockets amshia amakba mapang nunga IFCJ züngsemtemi kibong shia dangi oa chiyungtsü den hygiene supplies agüja liasü.

Eckstein-i lar staff tem aser volunteers-i kanga tasü itta temeim mapa inyakba atema tenüngsang agütsüba den külemi Khristantemi tenla

tajung agütsüba atema pelaba lemsatepa, "Medemer Khristantemi temeim sayuba den külemi sarasademtsüba ajanga iba mapa takok nguogo," ta metetdaksü.

"Onok nungita yariba ya senotsü agi yariba dang masü saka tanela tsütsü yariba densema lir," ta lai metetdaksü.

"Iba ya ajanga Israel nungertem kija masü, saka tensa tamajungtiba mapang nunga temeim teka songlartem aika lir ta sayur," ta laisa shisem.

Hopta ka tejaklen Eckstein-i, Iran-i Yihuda linük (Israel) alima map nungi samatsütsü ta sangdongba densema kuli balala ajanga Israel-i Iran anema apusor, ta metetdakja liasü.

Laisa, Laishiba nung tatem anogo mapang nung Yihuda nungertem alima tesem ajaklen nungi Israel nung adenshitsü ta shinzüka lir, anungji tang tatalokbatem ya Tejen Lai nung shia alibatam atalok tenzüker asütsüa akok, ta metetdakja liasü.

AO OSHI ANGAZÜKDAK:
TANÜ ANGAZÜKTSÜBA OJANG



Tepongba

(adj) taret masü, abentsü akokba (light)
* Tetsürtem nem khu tepongba shima bendaktsü.

Teponü

(n) tebang telonglen tepo janga aliba tesem (gums)
* Teponü ya teti merüka ayutsüla.

OLONG PAITEP # 7198

1		2			3			4		5
							6			
7			8							
							9			10
		11								
12										
					13					
14				15				16		
17										
							18			

TIPIEN

1. Lapok / Tenzük
6. Tarutsü indang tetzü
7. Yimer ajak
9. Ishika dang
11. Terongtong aser tepi
tetsüngda
12. T _ _ _ _ i
15. Tsürabur nungi lemozükba
17. Tetsür tanur dang ajaba
18. Shirang ajung

LANGTSÜNGLEN

2. Pei tasoli
3. Iba anogo
4. Telemsa ka
5. Maneni
7. Tekaratiba nung
8. Ki temalen
9. Temejung
10. Teimla aka
11. Tajatsü
13. Molung
14. Anogo semer ka
16. Tashi balaka

OLONG PAITEP # 7197 TELANGZÜBA

TIPIEN :

1. Yiru, 3. Tesola, 7. Yimra, 8. Tongti,
9. Peria, 10. Tanur, 11. Tamen,
13. Densem, 15. Temba, 16. Khuret,
17. Sang.

LANGTSÜNGLEN :

1. Yimti, 2. Rlan, 4. Shiner, 5. Atasa,
6. Etdan, 9. Putet, 10. Tembar,
11. Tatok, 12. Amang, 14. Saka.

NAI-A YA METETTER MA



South Korea nunger Oh Yohan-i ghonda 24 tsüngda pull-ups timtiba asüba otsü tasen ka yangluogo. Iba military officer yagi taoba küm September 28-29 tsüngda Incheon, South Korea nung pull-ups 11,707 süa otsü tasen ka yanglua liasü. Pai otsü tasen yangluba ya taoba ita officially agizükogo.

Mizoram nung shishilembartemi ILP ajang ajanga benoktsü mepeshir

Aizawl, Chiteni/July 2 (Agencies): Local shishilembartem tenüng nung nokdakba Mizoram Merchant Association (MIMA)-i, Bairabi-Sairang railway line lapokba sülen bendangertem state-i senoka aittsü ana nung aliba süoki ia bilemba mapang Home Minister K Sapdanga dang Inner Line Permit (ILP) inyakyim ajang ajanga benoktsü mepeshia metetdaksüogo.

Mongolbarnü Aizawl nung senden ka amenba mapang MIMA lenirtemi, railway lenmang tasenba yagi Mizoram ya tang mezügbuba national rail network den sendakteptsütsü, aser iba ajanga tanga state nungi migrant tem aruba timba

akümtsü ta shisabulua bilemba lemsatepogo. Parnokisa, ILP ya shitak benoka minyakra rongsenketzüng nung Mizo nungertem akoksatsü ana nung lir, ta tekümdangtsü metetdaksüogo.

Inner Line Permit ya Mizoram amala teküzmükba kübok aliba state kati aiba mapang India nunger ajaki nüngdakba kuli kakat ka lir, koba Bengal Eastern Frontier Regulation, 1873 kübok agütsür.

MIMA indang general secretary, RMS Dawngkimi-i ashiba agi, jenjang tesashi magira bendangertem tali senoka aiba ajanga Mizo nunger lokti libaliro aser rongsenketzüng nung

temelenshi adoktsü akok ta tsübua bilemer.

Parnoki Bairabi railway station nung ILP asandangak ajungkettsü, aser iba kuli kakat ya mashi mashi nem magütsütsü aser tang agüja alirtem indanga mapangshia asdanga alitsü mepeshia liasü.

Bairabi-Sairang railway line ya Northeast Frontier Railway-i yanglu aser tawa Commissioner of Railway Safety-i asadanga amshitsü asoshi temelaba agütsüogo aser July ita Ato Kilonser-i lapoktsütsü imlar.

Iba lenmang lapokba sülen iba ajanga Aizawl aser Assam nung Silchar na sendakteptsütsü aser Mizoram ya Indian railway network nung shilem ka akümtsü.

Manipur nung KCP züngsem asem apu

Imphal, Chiteni/July 2 (Agencies): Manipur kübok Imphal East district nung security force temi Kangleipak Communist Party (KCP) züngsem asem puogo, shirnok educational institutions tem nungi rakzükrakdemba nung densema liasü.

Security forces aser local police na longjemer Mongolbarnü iba district kübok tesem balala meita aoba mapang KCP züngsemtem ya pua liasü.

Sepaitemi mezügbuba Irilbung Police Station kübok Keirao Lairembi Leikai

tesem meita ao aser iba mapang KCP (NOYON/MFL) züngsem tejen Khoirom Ingoton Singh par kidang nungi pua liasü.

Ken o ashishiba sülen security personnel temi ano Porompat Police Station kübok Khurai Kongkham Leikai tesem meita ao aser iba mapang arishi küm 21 tain Khulem Tulajit Meitei apu. Pa ya KCP (Apunba) faction züngsem ka liasü.

Tatembangsa Khurai Chaithabi Leirak tesem meita aoba mapang KCP (PWG) züngsem Md Ajad Khan apu. Pa ya Khabeisoi

Sabal Leikai tesem nung alir.

Meita aoba mapang police temi single-barrel prangbong ka, 9 mm pistol ka den injang ana, bulletproof helmet tem, jacket tem aser protective plate tem nguteta liasü.

Iba den bendenloksema wireless radio communication sets asem, takhangba shiti ishika aser mobile phone asem den SIM card tem nguteta liasü.

Police-i ashiba agi, parnoki pua aliba telungpurtem yagi school aser tanga educational institution tem nungi rakzükrakdema liasü.

Tripura Congress-i Das tepsetba bushisüng-dangtsü SIT ka nem nongloksütsü akhang

Agartala, Chiteni/July 2 (Agencies): Tripura Pradesh Congress Committee (TPCC) tir Asish Saha-i, Dhalai district kübok Surma nungi BJP worker Ashish Das tepsetba ya Special Investigation Team (SIT) ka nem bushisüngdangdaksütsü ayongzükgogo.

Paiza, SIT ya IPS ketdangsür tejen ka tekolak ser inyaksangshidaksütsü takhangba agüja liasü.

Ashish Das, shiba tenu tanobusang temulung malemtsüsa asüba sülen küm ana tejakdang Congress nung aliba BJP-i oa liasü, pa ya June 17 nü nungi samar bushia liasü.

Anogo pongu sülen pa tasümayang ya Souvik Das indang brick kiln ka anasa angu. Ken o dak sendakba nung police-i tang tashi nisung ka danga pua mali.

Police nem tashishiba ka

agütsüba nung asüsang tetsü yagi local BJP MLA Swapna Das Pal kinungbo Paritosh Pal ya temulung melembertem rongnung tongtiba ta shiogo. Lai ashiba agi, Pal ya taoba mapanga Asim asüba mapang aitsü aser pai Ashish amokmerena liasü. Ajisüaka iba mapang kecha jenjang magi.

Police-i, bushisüngdang maneni südar aser aibelena alirtem aputsüsa ta shiogo, saka tang tashi nung formal jenjang ka danga agia mali. Iba ajanga opposition lenirtemi police aija arudar aser ashiba agi ken o nung yimden yimsüsürtemi minprong agütsüdar.

Kasa mapang nung Asish Saha-i anir Congress lenirtem aser state secretary aser opposition lenir Jitendra Chaudhury-i anir CPI(M) puri asür kibong semdangogo. Ajisüaka local MLA densema

BJP pur kati danga par kibong ya semdanga mali.

Osangbenertem den sensaksema mapang Saha-i local BJP lenirtem aija liasü. "Asüsang tetsüi aitsüba ya koba tashi shitak aji onoki mejangja, saka MLA Swapna Das Pal densema ruling party lenirtemi ola madoki aliba aser kecha jenjang magiba ya tenüsangtsübo kecha mali. Par kibong aser kitongertemi Pal aijaka police-i tang tashi pa dang ken o ashishia mali," ta paiza shisem.

Tripura DGP Amitabh Ranjan dangi yokba shiti ka nung Saha-i, asüsanger kinungertemi pa tepsetba nung yimden yimsüsürtem sendaka aliba land mafia densema aliba indang ashishiba lepschia metetdaksüogo. Paiza, ketdangsürtem dang kecha tebandang makai jenjang tapet agitsü mepeshia metetdaksüogo.

Court ashi mangaba yong Sheikh Hasina ita trok tepuokdak ayutsü

Dhaka, Chiteni/July 02 (Agencies): Bangladesh ato kilonser menden nungi atsüngdoker alila Sheikh Hasina ya court ashi mangaba yong tepuokdak ita trok ayutsü Bodhbarnü obendang agütsü. Iba temerenshi ya International Crimes Tribunal (ICT) ajanga agütsü aser obendang ya Chairman Justice Md Golam Mortuza Mozumder-i anir International Crimes Tribunal-1 indang züngsem asem bench ajanga agüja liasü, ta The Dhaka Tribune newspaper ajanga ashi.

Iba obendang nungsa tribunal ajanga Gaibandha nung aliba Shakil Akand Bulbul of Gobindaganj ya tepuokdak ita ana ayutsü obendang agütsü.

Ita 11 tejakdang Awami League lenir office yutsü linük nungi jena aoba sülen ken o mashi ka nung temerenshi agütsüba aibai mezüngbuba alitsü.

July 1 nü Sheikh Hasina-i

nisung meimchir anema mapa tamajung meinyak ta tai tonglokja aliba magizük, koba prosecutor temi mapa tamajung inyaktsü ajungmesoba, özüng alema maparen balala inyakba nung shilem agiba, mapa tamajung inyaktsü temelaba kumdaktsüba aser tasa tamajung yangluba aser nisung aika tepsetba menokdangtetba dak sendakba nung ken o pongu benoka lir, aser itemji Bangladesh nunger özüng kübok 'crime against humanity' lir.

Lar nokdanga aliba Awami League party ajanga London nungi sangdong ka agütsüba nung ibai "show trial" ka dang lir aser tai tonglokja aliri item taitzüba khenyongi magizüker ta ashi.

Hasina indang sorkari parnok sorkar anema longkak aitba pua tapet temerenshi agütsütsü totuyuba agütsür taoba küm July aser August tsünga nisung 1,400 tepsetogo, ta United Nations ajanga ashir.

August ita Hasina ya India-i jena aoba ajanga kaketshir temi anir sorkari anema longkak aitba tatem kati aru aser la Dhaka-i meyipa shilangtsü totuyuba agüjaka tashi mangar, kong la meliaka ken o ya June 1 nü lapoka liasü.

Ken o balala tejangja asem nung Hasina-i tongti shilem agiba lir aser ken o ajak tang tejembidak lir aser tashiyim amshia yimden anemer ajemreptsü merangba dak keta lir, ta prosecutor temi ashir.

Item ken o ya arishi küm 23 tain kaketshir longkak aiter Abu Sayeed tepsetba aser Dhaka kübok Chankharpul area nung dangar trok tepsetba aser Ashulia nung nisung trok tepseta mi nung arongba indang lir.

Hasina den ano ketdangsür ana item ken o nung densema lir. Kaji taoba interior minister Asaduzzaman Khan Kamal aser kaji ex-police chief Chowdhury Abdullah Al Mamun, shiba tepuokdak lir.

Anogo 60 Gaza ceasefire atema Israel-i conditions agizüker: Trump



Jerusalem, Chiteni/July 02 (Agencies): Gaza nung anogo 60 ceasefire alitsü asoshi renemtsü atema nüngdakba "conditions" nung Israel-i mulunga agizükogo, ta US Tir Donald Trump-i ashi.

Pa indang Truth Social nung Trump-i ashiba agi, iba ceasefire mapang US-i rara tembangtsü asoshi ajak den inyaktsü. Ajisüaka kechi komala ceasefire ka asüjar pai tejangja mashi.

"Qataris aser Egyptians shirnoki yimjung bener aruba nung yaritsü asoshi kanga meranga inyakogo, parnok final proposal agütsütsü. Hamas-i iba Deal agitsü ni imlar, kechiaser ibai tajungba makumtsü - IBAI TAMAJUNGBA ANG AKUMTSÜ," ta Trump-i zülua liasü.

Israel-i iba deal indang conditions nung mulungtepba tejangja shia mali. Hamas ketdangsür kati rara dang tembangra onoki tezüngzüksü ka yanglutsü renema lir ta ashi. "Rara tembangtsü asoshi

nüngdakbatem shidak lira mesüra parnoki khenyongti tatembang kati anira, proposal mashi mulunga agizüktsü Hamas renema lir," ta Taher al-Nunu-i ashi.

Israel indang Foreign Minister Gideon Sa'ar-i social media X nung, sorkar nung timbai pua alir chioktsü asoshi framework ka mulunger aser iba maongka ya mesüidaktsüsüla, ta zülua liasü.

Israel asoshi tezüngzüktep komaka yangludir yangluaka parnok asoshi tongtipang takhangbaji Gaza nung pua alir ajak masünunga timba chioktsü ya alitsü.

Tang tashi mechioki aliba nisung 50 shi nungi nisung 20 dak tema tang tashi takum lir ta amanger, aser iba yongji Israel nung rara anentsü khanga anogoshi amai longkak aiter.

Tawa Israel nunger osang kaketshir ka ajanga poll ka agiba nung Israel nunger kanga agi timbai rara tatem kati arudaktsüner, saka Bodhbarnü Israel Democracy Institute

ajanga poll ka agiba nung tang tashi Israel nunger timbai Israel Ato Kilonser Benjamin Netanyahu mesüra pa tebilemba nung tamang makar.

Rara metembang dang Hamas madak takok angutsüla ta Netanyahu-i ita aika jembia aru. Aser tang Washington-i asendenshir ajungshiba ajanga pa taginüba melenshi asü masüar ano mejangja.

Taruba hopta Netanyahu den senden ka amentsü lia Trump-i iba osang ya sangdonga liasü, kong US tiri pa taginüba nung ajang-ajanga nokdaktsü ta ashi.

Netanyahu-i Gaza nung rara tatem kati arudaktsüner südi ta ni amanger, ta Trump-i taoba mapanga shia lir.

Hamas-ia rara dang tatem kati arutsüsa süra, iba ceasefire agizüktsü mulunga lir ta shia lir. Ajisüaka iba talenba makaibo Hamas negotiators temi pua alir ajunga chioktsübo memulungtsü, kechiaser Israel mitkari Gaza nung asendenshir bomb poklokja amaktsü amai ajiteter.

Ajidang masü Hamas-i ceasefire mapang Israel mitkartem kar Gaza nungi ainshitsü akhanger.

Hombarnü Gaza City nung aliba seafront café ka nung Israel-i tayimtsü amshia amakdang Palestine nunger 20 shi tepset ta ashir.


Hamas-i October 7, 2023 nü Israel maka nisung 1,200 shi tepster ano 200 dak tema pua bener aoba tayang kepzüka Israel-i Gaza amakba nung nisung 56,647 bo tepsetogo, ta Gaza nung Hamas meyong health ministry ajanga ashir.

OFFICE OF THE MOPUNGCHUKET AIT LAISHIR TELUNGJEM

TENÜNGSANG AGÜTSÜR

Mopungchuket Ait Laishir Telungjem (MALT) nungi iba tezüluba ajanga wadang balala nung alakteta takok angur züngsem tajungtem nem tenüngsang agütsür:

1. **NOKTICHUNG B ÖZÜKÜM**, S/o. Wb.Bendangwapang & Wt. Yangermongla (Longsa), NSSB/CASE (Clerical & Allied Services Examination) 2024 tatidang nung LDA cum Computer Assistant, Department of Power (Directorate) jenjang ajangzük.



2. **MERENSENLA JAMIR**, D/o. Wb. L. Achi Jamir & Wt. Sentinaro Aier, NSSB/CASE (Clerical & Allied Services Examination) 2024 tatidang nung LDA cum Computer Assistant, Department of Works & Housing (NPWD) (District) jenjang ajangzük.



3. **YADEN JAMIR**, S/o. Wb. Imkongwapang & Wt. Rongsensüngla, NSSB/CASE (Clerical & Allied Services Examination) 2024 tatidang nung LDA cum Computer Assistant, Department of Power (District) jenjang ajangzük.



4. **ARIJUNGLA M LEMTOR**, D/o. Wb. Mayangsashi Lemtor & Wt. Repatula Jamir, St. Joseph University, Chümoukedima nungi BBA (Dept. of Management) nung Gold Medal jenjang ajangzük.



5. **NUNGSANGTI M LEMTOR**, S/o. Wb. Mayangsashi Lemtor & Wt. Repatula Jamir, St. Joseph University, Chümoukedima nungi Dept. of Mathematics (M.Sc) nung Gold Medal jenjang ajangzük.



TematibaTsüngremi parnok tarutsü wadang aser taküm maneni moajangma.

Sd/-
Ayimjem Jamir
Tir

Sd/-
Imlikumzuk Aier
Tongti Zülur

TENÜNGSANG AGÜTSÜR

IMRONG YOUTHS' ASSOCIATION LONGKHUM züngsem nungi NSSB tatidang nung LDA cum Computer Assistant (District) jenjang nguteba asoshi pelaba tenüngsang agütsür.

1. **Mr. Arongba Imchen**, S/o Mr. Yashimeren Imchen & Yavino
2. **Ms. Longtsupala**, D/o Mr. Makenmayang & Mrs. Imnungangla

Tarutsü anogotem nung nena taküm aser tenzüka wadang Tsüngremi maneni moajangma.

Sd/-
Marnungsang
President, IYA

Sd/-
Sakutilla Longchar
General Secretary, IYA

Pelaba Lemsateper

Onoki teti dang meima aser akhümstsüba aliba tsürabur aser tamangdir Rev.T.Pur Jamir (Küpza), iba alima nung arishi küm 88 tashi lir külen Tsüngremi pa 2025 küm June 26 nü iba alima nungi anir ogo.

Tsürabur asüba anogo nungi tenzüka Ao Baptist Arogo Mungdang, Dimapur Ao Baptist Arogo Signal Fellowship, Küpza Yimden, Küpza Baptist Arogo aser iba den külemi yimden, arogo, lokti tentet balala, kija kibong kwinakati temeim mulungsentsü agi aria bilema özü kibong den Dimapur nungi tasoyim Küpza tashi mang abenba mapang nung sarasadem, shisatsü, nübu, rongsen aser pei akokba tashi agi özü kibong tako marok ajemba mapang lemsatepa yaritepogo, nenok ajak dang kanga pelaba lemsateper. Özü kibongi nenok ajak dangi tsüngdong aruagi onok pelaba melemsateptet nung iba osang ajanga nenok ajak dang maneni kangasa pelaba lemsateper. Nenok mapa tajung ajak asoshi asen Tsüngremi nenok ajak azükarujangma ta özü kibong tamang sarasadem lemsateper.

Teti temeim nung
Chirnurtem, anükapangtem aser sosem dangsem

SANGDONGER

Ni, Mr. Imliyang Pongen, leacy member, S/o Mr. Limatoshi Pongen, Longsa Village, NSCN – (K) Niki faction nung liasü. Saka Naga yimden tarutsü nükla ji NSCN IM-i inyakba nung lir ta angateta tanü 2.7.2025 anogo nungi kü shisatsü temerük ajak agi mulungteta NSCN/GPRN nung züngsem ka küma yimden maparen ajak inyaka aotsü sangdonger.

Sd/-
Imliyang Pongen
Leacy Member, NSCN/GPRN (K) Niki

Manolo Marquez aser AIFF na pilaogo



Chiteni/July 2, 2025 (Agencies): India tebur football team head coach Manolo Marquez aser All Indian Football Federation (AIFF) na Bodhbarnü tangatetep nung pilaogo.

June 10 nü 2027 AFC Asian Cup Qualifiers campaign nung goal 0-1 agi Hong Kong makokba sülen tang iba telemtetba ya agiogo.

"India qualify asütsü takoktsü lir ta ni bilemer. Hau onok jashir aser dressing room ji asüpila sentong agir ama lir, saka onoki maneni raradar," ta

asaya makokba sülen Manolo Marquez-i ashi.

Pai coach mapa bener aliba mapang India team asaya ti asaya aser March ita Maldives dang goal 3-0 agi koka liasü.

Marquez, shiba lenisüba nung Hyderabad FC puri 2022 küm Indian Super League (ISL) title aben aser pai anir FC Goa puri Super Cup koka liasü, pai national team mapa ya 2024 küm June ita agizüka liasü.

Taküm küm tetenzüklen March ita FIFA rankings nung India dang nungi jenjang 56

agi tekübokba jenjang nung aliba Bangladesh team den draw asüba sülen Marquez-i Indian football dang kanga tezü adangba lemsatapa liasü.

"Ni aikabo mejembiner. Ni kanga jashir aser ajak dang kanga tezü adanger. Iba amai junga masayatetba atema kecha ashitsü mali," ta Marquez-i Shillong nung asayaba sülen ashi.

Taoba küm ishika tsüingda India nung football asaya jenjang tamajungba küma odar aser aji taoba Qatar nung AFC Asian Cup nung asaya ka danga makokba sülen group stage nung tsükatokba ajanga kuli agütsür.

2023 küm July ita India team FIFA rankings nung jenjang 99buba nung liasü, saka tang 127bubai luogo aser 2023 küm November ita nungi competitive football asaya ka danga koka mali. India team-i tatemsa taoba head coach Igor Stimac lenisüba nung Kuwait koker lir.

Leverkusen-i pound million 35 agi Quansah alizükogo

Chiteni/July 2, 2025 (Agencies): Bayer Leverkusen-i Liverpool nungi defender Jarell Quansah poud million 35 agi alizükogo.

Arishi küm 22 tain centre-back yagi iba German Bundesliga club den ya küm pongu atema tenangzüktepba yangluogo.

Quansah ya Honibarnü European Under-21 Championship final nung Germany akokba England team nung densema liasü.

Liverpool-i Leverkusen nungi midfielder Florian Wirtz aser defender Jeremie Frimpong na alizükba sülen tang agi tasembenbuba club ana tsüingda tenangzüktepba yangluogo.

Newcastle-i taoba küm lemluwa winger Anthony Gordon Liverpool-i yoka iba melen Quansah alizükba liasü, saka Liverpool-i magizük

Quansah ya kidang anitetba asayar ka asünung profit and sustainability rules (PSR) dak ajemdaker Liverpool-i Leverkusen nungi agizükba taah ajunga ya tajangzük ama mangaoka ayutsü.

Quansah ya Liverpool academy nungi anitetba

asayar ka lir aser pa club tenüing nungi 58ben asayaogo aser iba mapang pai goal asem idakja liasü.

Liverpool puri 2024 küm League Cup akokba mapang pai team nem teyari agütsü aser taoba season Arne Slot-i aniba team yagi Premier League koka asayaba mapanga pa league asaya 13 nung asaya liasü.

"Alima nung asayar tajungtibatemi amokbager aliba Liverpool defence nung paia kanga junga asaya-a tenüing yangluogo," ta Leverkusen sporting director Simon Rolfes-i ashi.

"Jarell densemba sülen onok defence tali tashitaitba akümtsü aser pa ya tarutsü atema tongtiban asayar ka asütsü."

Ibrahima Konate tarutsü mejangjai aliba mapang Liverpool puri Crystal Palace centre-back Marc Guehi alizüktsü tejangraba lir.

France nunger centre-back ya Liverpool nungi ita 12 dang asayatsü anung lir aser tang tashi tenangzüktepba yanglushitsü atema mulungtepa mali. Kasa mapang nung Joe Gomez tarutsüa mejangjai lir.

SFS, GHS Meriema nati Pre-Subroto asayamung kokogo



Kohima, Chiteni/July 2 (TYO): State level Pre-Subroto Tournament 2025 July 1 nü tembangogo aser SFS Higher Secondary School Chumoukedima aser GHS Meriema nati Under 15 Boys aser Under 17 Girls category asayamung ya kokogo.

Iba asayamung akokba sülen team ana yagi taruba National Subroto Cup Tournament 2025 koba Bangalore aser Delhi nung asayatsü lir, iba asayamung nung state tenüing nungi asayatsü.

State level Pre-Subroto Tournament ya Department of Youth Resources & Sports aser Nagaland Football Association (NFA) na longjemer Indira Gandhi Stadium

Kohima nung June 30 aser July 1 nü ayongzükba asaya liasü.

Under 15 Boys category nung SFS Higher Secondary School Chumoukedima-i final asaya nung Christian School Molvon (Chumoukedima) koka liasü.

Tetsür asaya nung GHS Meriema-i final asaya nung GMS L.Khel Kohima koka liasü. Category anaprongla nung takoker aser Runner up nem senpet sen 30,000 aser 20,000 agütsüogo.

Asayamung shibangba sentong nung alakteta jaokerji Nagaland's Yourh Resources & Sports advisor S. Keoshu Yimkhiung liasü aser pai ashiba agi, iba asayamung ya tokteptsüba

atema sabang ka dang masü saka sempet tajungtem, telungjem aser lanur tashi benjungba mapang ka liasü.

Whistle apur asaya tenzükba nungi tatembangbuba goal tashi nung asenoki Under-15 Boys aser Under-17 Girls category anaprongla nung team temi teamwork, discipline, aser sportsmanship sayuba nguogo, ta pai ashi.

Yimkhiung - isa, asayartemi bendanga agüja asayaba, parnok tasü aitba aser metoktsüi raratsü atema tanüla tajung sayuba ajanga iba asayamung ya teti bilemtetsüba asayamung ka kümdaktsüogo, ta ashi

Sentong nung MLA aser General Secretary NFA Benei M. Lamthiu-ia o tatsüka jembia liasü. Iba sentong ya Kethosituo Shekhose, Director, Youth Resources & Sports lenisüba nung agi aser Commissioner & secretary for Youth Resources & Sports, Nagaland Anthony Ngullie-i lokti pela agizükba o jembia liasü. Sentong nungsa Youth Resources Officer Naroenla-i tepela o jembi. Nagaland Taekwondo Association (NTA) tir Pele Khezhie-a iba sentong nung densema liasü.

ICC Test Rankings: Rishabh Pant jenjang trokbubai tuogo

Chiteni/July 2, 2025 (Agencies): India team wicketkeeper-batter Rishabh Pant-i tawa sayaba ICC Men's Test Rankings nung pa indang career nung rating tajungtiba ajangzüktoogo. England den mezüingbuba Test asayaba mapang century ana yangluba sülen pa Test batting rankings nung jenjang trokbuba tongtoogo.

England den mezüingbuba Test asaya mekokaka Pant-i mezüingbuba aser tanabuba innings nung run 134 aser 118 yanglua rating point 801 ngua liasü. Pa tang temaba jenjang nung aliba batter Joe Root dang nungi point 88 agi dang tajemba lir.

Headingley nung India den asayaba mapang Root-i run 28 aser out mesüi run 53

yangluba sülen pa maneni temaba jenjang nung lir. Pa sülen tanabuba jenjang nung Harry Brook lir, shibai pa rating points 15 agi dang memenepi lir.

England nunger asayar Ben Duckett-a pa indang career nung tang jenjang tajungba tongteta tibuba nung lir. Leed nung pai tanabuba innings nung run 149 yanglua team takok dangi aniba sülen iba ya ajangzüktoogo.

Australia nunger asayar Travis Head-a jenjang asem tejakdangi tua tang terbuba nung lir. Barbados nung West Indies den mezüingbuba Test run 159 agi akokba mapang half-century ana yangluba sülen pa tejakdangi tuogo.

BILEMDANGANG

"Tesangwa tila katia tamangdak ajak sangwatsür."